



## VERSCHNUUFFER

[www.verschnuuffer.ch](http://www.verschnuuffer.ch)

Fasnacht 2012

**„Alli fir aine und är fyr sich!“**

„O Biene, Biene, gib mir Honig!“  
Wär kennt die luschtig Nummere noonig,  
wo d Gleen vom Zirkus Knie als gänn,  
wenn d Lyt ganz hätzlig lache wänn?

Nid ganz so luschtig, aber z lache  
dien aim die vyyle Hälfer mache,  
wo am Tattoo ihri Feriezyt  
verbroote dien, dermits es git.

Freywillig styyge die in d Hose  
und fraie sich die Muusig z loose  
wo us der Wält no Basel kunnt  
und gligglic macht zwai volli Stund.

S stieng ooni all die liebi Hilf  
das scheene Feschkli rächt im Schiff.  
Es frait sich draa die ganzi Stadt  
und aine findet s bsunders glatt:

Der Eric J., dä schlaui Finder,  
das isch der Basel Tattoo-Grinder.  
Als pelzig faisse Honig-Bäär,  
macht är sich s Läbe nid sehr schwäär.

Als gschigge Gschäftsmaa, wo-n-är isch,  
zieht är au d Partner iiber e Tisch.  
Är gnisst mit em charmante Lache,  
dass d Lyt fir iin der Duubel mache.

E rächte Kick bruuchts scho zem Starte,  
denn mues är nur uf d Biinli warte:  
Die kurve-n-uffgret um sy Kopf  
und fille-n-iim sy Hoonig Dopf.

Die geen denn nid mit lääre Händ:  
Nänäi! – Beloonig git s am Änd:  
Zem STAFF-Shirt griegsch e haissi Wurscht  
und ebbis z Dringge fir e Durscht

So goot s denn wider ab in Stolle,  
Dy T-Shirt sait: Bisch ganz e Tolle!  
Jetz kasch Di seeleruehig erhoole –  
Dy Scheff, dä soll der Teyfel hoole!

Was maint dä Gnushti, nundefaane?  
Wo kämt au unsri Gsellschaft aane,  
wenn alles immer miestisch zaale  
- nid numme d Stimme voor de Waale!

So Voluntiere isch doch digg:  
d Kasärne putze findsch jetz chic,  
De fidesch gligglic alli Plätz,  
im Dienscht hesch amme do, wie lätz!

Was nid grad casht, das isch nyt wäärt.  
Das sait ys der modärni Määrt.  
Drum kasch vergäbets go probiere  
Lyt fir e Jöbbli z motiviere.